



Inatsisartunut ilaasortaq
Kuno Fencker, Naleraq
/Maani

London Mining pillugu § 37 naapertorlugu apeqquaqqaammut nr. 143-mut akissut

Inatsisartut suleriaasianni §37, imm. 1 naapertorlugu, London Mining pillugu apeqqutit matuma kingulianiittut Naalakkersuisunut saqqummiuppatit.

Apeqqutit matuma kinguliani akissuteqarfigineqarput.

Apeqqut 1. Isua-projektimut piianissamut akuersissut atuuttoq pillugu killiffik sumiippa massakkut, tamannami nalunaarutigineqarnikuuvoq London Mining Greenland A/Simit 2013-imi?

Akissut: 2021-mi pisinnaatitsissummik pigisaqartup piianissamut matusinissamullu pilersaarummik tunniussinissamut piffissamut killigititap malinnissaa sumiginnarmagu, Naalakkersuisut akuersissut uterteqqaat. Taamaattumik Isuani suliaassamut piianissamut akuersissut tunngaviatigut atuukkunnaarpoq. Kisianni pisinnaatitsissummik pigisaqartoq Kalaallit Nunaanni Eqqartuussivimmut suliaassanngortitsivoq, piianissamut matusinissamullu pilersaarutip tunniunneqarnissaanut piffissamut killigititap sivitsornissaa Naalakkersuisut itigartissimagaat aammalu pisinnaatitsissummik pigisaqartup akuersissutaanik arsaarinninneq atuuttussaanngitsoq oqaatigalugit. Naalakkersuisut tamatumunnga isumaqataanngillat.

Apeqqut 2. Naalakkersuisut nalunnginnerlugu eqqartuussinermi suliap ingerlasup sumut killinnera LMG aamma Namminersorlutik Oqartussat akornanni, qaqugulu aalajangiisoqarnissaa naatsorsuutigineqarpa?

Akissut: Eqqartuussivimmi suliaasaq suli aallarteqqaarneraniippoq. Suliami allakkiani ataasiakkaani allagaatinik takunninnissamut Namminersorlutik Oqartussat itigartitsinerat pillugu apeqqut pisinnaatitsissummik pigisaqartup suliakkiissutigaa, taannalu aallaqqaammut Namminersorlutik Oqartussanut iluaqutaasumik aalajangiiffineqarpoq. Naammagittaalliutiginissaanut piffissamut killigititap naareernerata kingorna, aalajangiinnerup taassuma Nunatta Eqqartuussivianut suliakkiissutigiginissaanut pisinnaatitsissummik pigisaqartoq akuerineqarpoq, aammalu ulloq 10. september 2025 naammagittaalliornissaminut killilerneqarluni. Apeqqut taanna aatsaat paasinarsinneqareerpat, sammisaq pingaarneq (suliami najoqqutassanut apeqqut) Kalaallit Nunaata Eqqartuussiviani suliarineqassasoq naatsorsuutigineqarpoq.

Ulloq: 01/09 2025
Suliap nr. 2025 - 17344
Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: mlsa@nanoq.gl
www.naalakkersuisut.gl

2026-mi ukiup affaani siullermi suliap Kalaallit Nunaata Eqqartuussiviani aalajangiiffigineqarnissaa Naalakkersuisut naatsorsuutigaat.

Apeqqu 3. Akuersissutigineqarsimasoq piffik pineqartoq ullumikkut Naalakkersuisut qinnuteqartunut nutaanut ammateratarsinnaavaat?

Akissut: Eqqartuussivimmi suliassami aalajangiisoqarnissaata tungaanut, sumiiffik qinnuteqaatinut nutaanut matoqqavoq. Piiaanissamut akuersissut tunuartinneqarsimasoq, ulloq 22. november 2021 Naalakkersuisut naalakkersuisut.gl-imi nalunaarutigaa. Nalunaarummi tassani allassimavoq, sumiiffiup neqeroortitsivigineqaqqinnginnerani akuersissutip pitsaasumik tatiginartumillu utertinneqarnissaa Naalakkersuisut aallaqqaammut qulakkeerniaraat.

Eqqartuussivimmi suliassap ingerlanera eqqarsaatigalugu, eqqartuussivimmi suliassap naammassinissaata imaluunniit siumut ingerlalluarneriinnarnissaata tungaanut sumiiffiup ammaqqinneqarnissaata utaqqisinnissaa naapertuuttoq, aalajangiisoqarpoq. Sumiiffiup matoqqatikkallarneqarnerani aatsitassanut tunngasunik suliagarnerit allat arlaatigut annertussusilimmik akuerineqarsinnaapput. Taamaattumik aatsitassanut tunngasunik suliagarnerit allat annikitsuinnaat akuerineqarnissaat naapertuuttoq, eqqartuussivimmi suliassap ingerlanera eqqarsaatigalugu aalajangiisoqarpoq. Tamatuma kingunerisaanik:

- sumiiffimmi aatsitassanut tunngasunik suliagarneq pillugu Inatsisartut inatsisaat imaluunniit najukkani aatsitassanut tunngasunik suliagarnerit pillugit Inatsisartut inatsisaat malillugit akuersissutinik sumiiffimmi kisermaassisussaatitaalluni akuersissutinik allanik tunniussisoqarsinnaanngilaq
- ilisimatuussutsikkut misissuinerneq suliagarneqarnissamut akuersissummik tunniussisoqarsinnaavoq
- sumiiffik misissueqqaarnissamut akuersissummi pineqartunut ilaatinneqarsinnaanngilaq
- inuinnaat najukkani aatsitassanut tunngasunik suliagarnerit pillugit Inatsisartut inatsisaanni kapitali 2-mi aalajangersakkat malillugit sumiiffimmi aatsitassanik katersisinnaasut piiaasinnaasullu. Tassa imaappoq aatsitassanik kaanngarsimallutik nunamiittunik katersisinnaapput kiisalu atortut tigummiaannartakkat atorlugit aatsitassanik piiaasinnaapput

Sumiiffik akuersissuteqarfiusoq Kalaallit Nunaanni pisortatigoortumik aatsitassanut akuersissutinut qinnuteqarnermut nittartakkami mattunneqarpoq, taamaalilluni sumiiffik qinnuteqaatigineqarsinnaanani.

Apeqqu 4. Naalakkersuisut Isuani peqarfik tuniniaqqissallugu eqqarsaatersuuteqarpat, Namminersorlutik Oqartussat eqqartuussivimmit utertitsinissaannut taparserneqassangaluarpata?

Akissut: Eqqartuussiviit akuersissutip uterteqquneqarnerani Namminersorlutik Oqartussat taperserpassuk, sumiiffik neqeroortitsivigineqassappat, Naalakkersuisut suleriaasissat assigiinngitsut arlallit akornanni toqqaanissaat aatsitassanut tunngasunik suliaqarneq pillugu Inatsisartut inatsisaanni periarfissaqartinneqarpoq.

1. Matu-ammasumi-suleriaaseq – suleriaatsimi tassani siunertaavoq, ingerlatseqatigiiffiit sapinngisamik amerlanerpaat qinnuteqaatinut suliat ingerlanneqarneranni peqataanissaasa ajornannginnerulersinnissaa.

Matu-ammasumi-suleriaaseq aallartittoq pillugu nalunaarut Naalakkersuisut tamanut saqqummiuttarpat – nittartakkaminni immaqalu tusagassiuutini allani. Nalunaarummi paasissutissiissutigineqartussaavoq sumiiffiit aamma aatsitassat sorliit pineqartunut ilaatinneqarnerisut, kiisalu ingerlatseqatigiiffiit soqutiginnittut piumasaqaatit atugassarititaasullu pillugit annertunerusunik paasissutissanik qanoq pissarsisinnaanersut. Qinnuteqaatit siusinnerusukkut tamanut saqqummiussinerup siulliup kingorna siusinnerpaamik ullut 90-it qaangiunneranni nassiunneqarsinnaapput.

2. Nalinginnaasumik neqeroortitsineq: aamma tassani nalunaarut, qinnuteqaatinik nassiussinissamik kaammattuiffiusoq, Naalakkersuisut tamanut saqqummiuttarpat. Taamatut tamanut saqqummiussineq qinnuteqarnissamut killigitap naanissaa sioqqullugu minnerpaamik ullut 90-t qaangiunneranni pisussaavoq aammalu matu-ammasumi-suleriaatsituulli tamanut saqqummiunneqartarluni – tassalu nittartakkami immaqalu nutaarsiassaqaartitsivinni.

3. Imikkut ittunik neqeroortitsinerit: suleriaaseq taanna pisuni immikkut ittuni Naalakkersuisut atorsinnaavaat, tassani neqeroortitsinerit annikinnerusut siunnerfeqarnerusullu ingerlanneqarsinnaallutik.

Sumiiffik neqeroortitsivigeqqinneqassappat periarfissat matuma siuliani allassimasut arlaat toqqaaneqassanersoq, Naalakkersuisut aalajangiutinngilaat.

Qinnuteqaatit tunniunneqartut tunngavigalugit akuersisummik Naalakkersuisut tunniussinngissinnaapput.

Apeqput 5. Saaffiginnittoqareernikuua imaluunniit allanit soqutiginnittunik tiguserusuttunik imaluunniit nutaamik akuersisummik piffimi qinnuteqartoqarpa?

Akissut: Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup ukiuni marlussunni kingullerni sumiiffik pillugu saaffiginnissutit sisamat tiguai. Saaffiginnissutit sumiiffiup qanoq killiffeqarneranut tunngassuteqarput. Saaffiginnissutit ingerlatseqatigiiffinni aatsitassarsiorluni misissuisartunit nunanit

allaneersunit mikinerusuneerput kiisalu nunani allani inuussutissarsiornermik suliaqartumeersuullutik.

Sumiiffik maannakkorpiaq qinnuteqaatinut nutaanut matoqqatinneqartoq kiisalu sumiiffiup atugassarititaasut immikkut ittut, sulii aalajangersarneqanngitsut, tunngavigalugit neqeroortitsivigineqarnissaa naatsorsuutigineqartoq pillugu paasissutissiilluni, saaffiginnissutit akissuteqarfigineqartarput.

Tamatuma saniatigut sumiiffimmi ilisimatuussutsikkut misissuineramik suliaqarnissaq pillugu danskit ilisimatusarfianniit apeqquteqartoqarpoq.

Aamma annikitsumik aatsitassarsiornermik suliaqartunit pisortatiguunngitsumik ingerlaavartumik soqutiginnittoqartarpoq.

Inussiarnersumik inuulluaqqusillunga

Naaja H. Nathanielsen

Naaja H. Nathanielsen

Inuussutissarsiornermut, Aatsitassanut, Nukissiutinut, Inatsisit
Atuutsinneqarnerannut Naligiissitaanermullu Naalakkersuisoq